

nostris. Pruna copiosius sumta diarrhæum causant, his regionibus periculosam. Noces probantur, sed modicæ.

*Mercimonia.*

At præstantissimum hujus tractus donum sunt arundines saccharifera, quarum magna hic copia, nec ullibi meliores, quæ brevissimo tempore assurgunt, extollunturque. Quod si eo, quo in Brasilia à Lusitanis fit, modo saccharum tractare scirent, summas inde opes sibi compararent Indi. Gossipium mercimonium est vulgare valde, unde & indigenæ *Hammaccas*, ita lectos suos vocant, conficiunt. Est & hic species quædam canabis maximo in usu, cujus filium ea fere, qua byssum, subtilitate est, conficiendis linteis accommodum. Tincturis excellit eximiis: quæ *Amoto* vocatur, ex rubra bacca colligitur; & præparata, uti debet, colore tingit croceo. Est quæ cæruleum colorem lanæ confert, foliis certis arborum rubrum, quibusdam lignis purpureum tingunt. Gummi odoratissima sunt Ambra flava, gummi Lemnium, *Colliman* & *Banatta*. Postremum hoc subnigrum piceumque, si igne liquefiat, suavissimo suffitu ædes replet. *Baratta* balsamum est, sanandis vulneribus potentissimum. Iaspides quoque hic, & porphyreos lapides reperire

est, ac tabacum herbam, nostratibus, heu nimis, notam.

Fluvius *Oronoque*, Andaluziam novam à Gujana dirimens, alias ab Hispanis Orellana vocatus fuit. De hoc mira & Hispani & Angli prodidere, ut per quem aditum patere rebantur in auriferam Gujanam, & urbem *Manoam*, aut celebratissimam istam *Dorado*, quæ quidem res magno stetit Hispano, qui nihil non investigatum reliquit, uti loca ista deprehenderet, maxime id hac via conatus. Ex novo regno Granatensi magna sui parte originem trahit. Vocatur & aliter *Typhari*. Ostium est positum altit. grad. 8, & minut. 50. Sitæ ad hunc est provincia *Amapaja*, dives auri, sed situ depresso. Aquæ vero, quæ per terras paludosas ac lutosas variis rivulis labuntur, rubent, cumque animalculis noxiis scateant, periculose bibuntur.

Ipsa vero Gujana, quoad interiora loca, sedesque mediterraneas, nondum orbis nostri populis perspecta, montibus circumvallatur, uti patet in Tabula. In ejus medio fere vastissimus se aperit lacus, quem *Iaos* vocant *Roponovini*, Caribes vero *Parime*. Magnitudine mare quoddam æquat, crediturque in ejus ripa posita esse magna urbs *Manoa*.



*America.*

Q

BRASI-